

Visoki predstavnik dozvolio smjenjenim zvaničnicima da obavljaju javne nerukovodne funkcije

Visoki predstavnik Paddy Ashdown je danas donio Odluku kojom se svim zvaničnicima smijenjenim s funkcija dozvoljava da se prijave ili da, ukoliko budu odabrani, obavljaju javne nerukovodne funkcije u administrativnim tijelima, na koje se postavljenja vrše putem javnog konkursa. Ova Odluka se ne odnosi na zvaničnike koji su smijenjeni s funkcije zbog opstruiranja saradnje sa Haškim tribunalom odnosno pružanja podrške haškim optuženicima.

Za zvaničnike koje je smijenio visoki predstavnik i dalje ostaje na snazi zabrana kandidiranja na izborima, kao i zabrana obavljanja svih funkcija u javnim tijelima nadležnim za javnu sigurnost, odbranu i obavještajni sektor, kao što su državno Ministarstvo sigurnosti i Ministarstvo odbrane, SIPA, DGS i entitetska Ministarstva unutrašnjih poslova.

Inicijativa visokog predstavnika odražava stav međunarodne zajednice koja smatra da treba nastaviti s procesom vraćanja odgovornosti institucijama BiH, s obzirom da je Bosna i Hercegovina obilježila desetu godišnjicu potpisivanja Dejtonsko-pariškog mirovnog sporazuma putem otvaranja pregovora o stabilizaciji i pridruživanju s Evropskom unijom.

«Došlo je vrijeme da se poduzme još jedan konkretan korak ka vraćanju odgovornosti za vođenje zemlje na nivo institucija Bosne i Hercegovine», rekao je visoki predstavnik. «Provođenje ove Odluke predstavlja test zrelosti za institucije BiH i za politički establišment u cjelini. Ovo je proces koji će u narednom periodu biti proširen ili poništen, u zavisnosti od

rezultata», dodao je visoki predstavnik.